



www.BibleForChildren.org




Juan 14



Wejt tjaajinta zöñinaca, Yooz Ejpzquin criyiñchuccha
nizäza wejtquiz zakaz criya. Ana turwayzi kuzziz
cjee. Wejt Ejpz arajpach kjuyquin wacchi campu
zejlcha, kamzjapa. Ana nizta zejltasaz niiqui wejrqui
anchucaquiz maztasacha. Jaziqui wejrqui okacha
anchucaltajapa
campu
tjaczquizjapa.



Jalla nuž campu tjaczñi ojkžcu, wiltal quejpžčacħa
anħuc ħjichi, wejttan kamzjapa. Jakziquint wejr
želaħaja, jalla nicju anħuc zakaz želaquicħa, weriž
ħjichtaž cjen.



Wejr Juanqui anchucaquin cijiržcucha. Wejrqui
anchuca jiltcha, Jesucristužquin kuz
tjaatiquiztanaqui. Uchumqui Yooz


mantuquiz kamchiz cjen,
sufriča. Pero chjul



sufritami žejlchaja,
Jesucristuqui
uchumnacquizimi
pasinsis kuzziz
cjiskatcha.




Wejrqui kot taypiquiz kolta yokquiz želucha,
Patmos cjita tii yoka. Jalla ticju preso
želucha, Yooz taku parlitiquiztan,



nizäza Jesucristuz'
puntuquiztan
maztiquiztan.



Nii orapacha wejrqui Espíritu Santuz mantiz
poderquiz zelatucha. Jalla nuz zejlcan, arajpachquin
tsjii chawc mantiz julz cherchincha. Nizaza nii
julzquiz tsjii julzi zelatcha.




Nekztan tjapa arajpachquin zëjlñinacztan, nizäza
tjapa tii muntuquiz zëjlñinacztan, nizäza tjapa tii
yok koztan zëjlñinacztan, nizäza
tjapa kotquiz zëjlñinacztan,
jalla nuz' tjappacha niiz' puntu
cjichicha:




"Nii chawc mantiñizquizimi nii Uuzizquizimi wiñayjapa
honora waytizintaj cjila; nizaza nii pucultizquiz
wiñayjapa honorchiz cjila; nizaza
wiñayjapa rispittaj cjila; nizaza
tjapa azziz cjila watay wata".




Nekztanaqui wejr Juanqui ew Jerusalén watja
cherchincha, Yooz arajpachquiztan tjonñi. Jaknužt
tsjaa zalzin turqui persun tjowaztajapa tjaczinzlaja,
jalla nizta zuma tjacžtača ew watjaqui.
Nekztan arajpach mantiz puestuquiztan
tsjii jora
nonzinča.




Altu tawkz̄tan tuz̄ cjichicha: —Cherz̄ca. Yoozqui
z̄oñinacz̄ taypiquiz kamcha. Yoozqui ninacz̄tan chica
kamaquicha, niz̄aza nii z̄oñinacaqui Yooz wajtchiz
z̄oñinaca cjequicha. Jalla niz̄tiquiztan Yoozqui
ninacz̄tan chicz̄ cjequicha.



Nekztanaqui nii anjilaqui wejtquiz tsjii limpu puju
tjeezicha. Nii puj kjazqui žeti tjaañi cjicha. Nii
kjazqui ispijužtakaztachá. Yooz mantiz
puestuquiztanami, Uzažtakaz Jesucristuž mantiz
puestuquiztanami ulnatchá.



Nizäza nii wajtquiz kamcan, anaz' tjuñimi jiizmi
pecasacha, kjanzjapa. Yoozpachaz' kjan'cha,
Jesucristuz'tanpacha.



Jalla nii wajtquizqui anaz' anawali
kamañchizqui luzasacha. Nizaza
Yooz chjaawjkatta zöñinacami
ana luzasacha, nizaza incallñi
zöñinacami ana luzasacha.
Jakziltiz' tjuut
Uuzaztakaz
Jesucristuz' liwruquiz
cjijrtazlaja, jalla
ninacakaz Yooz
wajtquiz luzasacha.



Yoozqui ninacz' kjaz kaajmi
chjujzinaquicha. Nizaza
ninacz'ta anaz' iya ticz
zelaquicha, nizaza iya kaazmi,
llaquizmi, sufrismi anaz'
zelaquicha. Jalla ninacaqui
k'ala watchicha.




Nizäza nii wajtquiz kamñinacaqui ana iya casticz
cheraquicha. Yooz Jiliriz mantiz julzmi, Jesucristuz
mantiz julzmi nii wajtquiztachä. Ninacz
sirwiñinacaqui nii pucultizquiz rispitaquicha.

Nizäza Yooz wajtchiz
zöñinacaqui Yooz
cheraquicha. Nizäza
Yooz tjuuqui nii
zöñinacz ayquiz
cjiirtaz
cjequicha.




Nekztan ticzi zöñinaca cherchinchä, koltami pakjimi,
mantiñi Yooz yujcquiz tsijtchi. Jalla nekztanaqui
Yooz liwrunaca cjetztatacha. Nizäza yekja liwru
cjetztatacha; liwriita zöñinacz' tjuu listichiz
liwrutacha. Nii Yooz liwrunacquiz tjapa
zöñinacz' paatanacaqui apuntitatacha.
Ticzinacaqui apuntita paatiquiztan
jama pjalztatacha.
Jakziltiz' tjuuqui
liwriita zöñinacz'
tjuu listiquiz ana
zejlchaja, jalla niiqui
asñi uj kotquin
tjojttazakaztacha.



Espíritu Santuqui Jesucristužquiz kuzziz zöñinaczťan
"Jesucristuqui tjonla" cjicha. Nizäza jakziltat tii
chiita taku nonznachaja, jalla niizakaz
"Jesucristuqui tjonla" cjila.



Jakziltat kjaztakaz Yooz zuma kamaña ancha
pecchaja, picha, Yoozquiztan zuma kamaña tanzjapa.
Nuzüllakaz tanznasacha. Zuma zëti tjaañi
kjaztakazza nii zuma kamañaqui.



Yooz Ejpqui tii muntuquiz zëjlñi
zöñinaczquiz ancha okzquichipanča.
Jalla niztiquiztan niiz zinta Majch
cuchanzquichicha, zöñinaczquiz ew
kamañchiz cjiskatzjapa.



Jakziltat niiz̃ zinta Majchquiz
criyachaja, ew kamañchiz cjequicha
Yooztan wiñaya kamzjapa ana
infiernuquin sufrajo.



Romanos 3:23 Tjapa zöñinacaqui tsjii pariju ujchizza.
Jalla nizta ujchiz cjenacqui Yoozqui ana jeczquizimi
honorchiz cjiskatasacha.

Romanos 6:23 Jakziltat anazum uj paañi kamañquiz
kamchaja, jalla niiqui Yooziz castictaz cjistancha. Nuz
waquizicha. Pero Yoozqui zöñinacztaajapa tsjii pajk
favora paachicha, zöñinacaz ana waquizan. Nuzukaz
paachicha niiz zuma okzñi kuzziz cjen. Jaziqui jakziltat
Yooziz liwriita cjechaja, jalla niiqui Jesucristo Jiliriz
cjen Yooztan wiñayaz kamaquicha.

Hebreos 9:27 Tjapa zöñinacaqui tsjii wilita ticstancha tii
yokquiz. Jalla nekztan pjalzta cjequicha, Yooz yujcquiz
zuma, anazuma, nii.



Efesios 2:8,9 Yooz okzñi kuzziz cjen, nizäza anchucaz' Jesucristuzquin kuz tjaachiz' cjen, anchucqui liwriitacha. Jalla nii liwriitaqui anacha anchucaz' cjenahui. Antiz Yooz cjenpankazza nii liwriitaqui. Jalla niicha anchucaquiz liwriiz tjaachiqui. Anchucaz' paata obranacquiztan nii liwriizqui anaz' tjoncha. Jalla niztiquiztan anaz' jecmi mit kuzziz cjesacha.

Romanos 10:9,10 Anchucqui ticlarstancha, Jiliripancha Jesucristuqui, cjicanaqui. Nizäza anchuca kuzquiz criistancha, Yoozqui Jesucristo ticziquiztan jacatatchicha, jalla nii. Jalla nekztan liwriita cjequicha. Zoñinacaqui tjapa kuztan criistancha, nekztan Yooz yujcquiz zuma cjequicha, ana ujchiz. Nizäza persun tawkz'tan "Jesucristuzquiz kuz tjaa-ucha" cjican ticlarstancha, nekztan liwriita cjequicha.



Juan 3:16,17 Yooz Ejpqui tii muntuquiz zëjlñi zöñinaczquiz ancha okzquichipancha. Jalla niztiquiztan niiz zinta Majch cuchanzquichicha, zöñinaczquiz ew kamañchiz cjiskatzjapa. Jakziltat niiz zinta Majchquiz criyachaja, ew kamañchiz cjequicha Yooztan wiñaya kamzjapa ana infiernuquin sufrajo. Yooz Ejpqui niiz Majch tii muntuquiz cuchanzquichicha. Niiz cjen zöñinaca liwriita cjesacha infiernuquin ana casticta cjisjapa.

1 Juan 5:11-13 Nizäza Yoozqui cjicha: —Wejt Majchqui anchuca ujquiztan ticzicha. Jalla nekztan anchucqui wejttan wiñaya kamaquicha, wali cuntintu. Jakziltat Yooz Majchtan tsjii kuzziz kamchaja, jalla niiqui Yooztan wiñaya kamaquicha. Nizäza jakziltat Yooz Majchtan ana tsjii kuzziz kamchaja, jalla niiqui Yooztan ana wiñaya kamasacha. Anchucqui Yooz Majchquin criicha tjapa kuztan. Jalla nekztan Yooztan wiñaya kamaquicha, wali cuntintu. Nii zizjapa, anchucaquin cjijrzcuha wejrqui.



Juan 14; 2 Corintios 5; Apocalipsis 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Chipaya Bible (cap) © 2009, Wycliffe Bible Translators,
Inc. All rights reserved.

<https://live.bible.is/bible/CAPSBB/MAT/1>

©2026 Bible for Children, Inc.

www.M1914.org

www.bibleforchildren.org

